

CONVENIO DE COLABORACIÓN ENTRE A CONSELLERÍA DE FACENDA E ADMINISTRACIÓN PÚBLICA E A ASOCIACIÓN GALLEGA DE JUGADORES ANÓNIMOS (AGAJA) PARA O APOIO DE ACCIÓNS EN MATERIA DE XOGO RESPONSABLE, DURANTE O ANO 2025.

Santiago de Compostela

REUNIDOS

Dunha parte, D. Miguel Corgos López-Prado, conselleiro de Facenda e Administración Pública, nomeado polo Decreto 44/2024, do 14 de abril, actuando en nome e representación da Comunidade Autónoma de Galicia, en virtude das facultades que lle atribúe a Lei 1/1983, do 22 de febreiro, reguladora da Xunta e da súa Presidencia.

Doutra, D. José Luis Comesaña Lorenzo, presidente da Asociación Gallega de Jugadores Anónimos (AGAJA), inscrita no Rexistro Central de Asociacións desta Comunidade Autónoma co nº 2004/7429-1ª.

Ambas as dúas partes recoñécense mutuamente a capacidade xurídica bastante e poderes suficientes e axeitados en dereito para obrigar ás súas representadas e a tal fin,

EXPOÑEN

PRIMEIRO - O artigo 27 do Estatuto de Autonomía de Galicia sinala como da competencia exclusiva da Comunidade Autónoma, entre outras, a ordenación dos casinos, xogos e apostas, con exclusión das apostas mutuas deportivo benéficas. Mediante Real Decreto 228/1985, de data 6 de febreiro de 1985, a Administración Xeral do Estado transferiu a Galicia competencias e funcións en materia de xogo.

As competencias en materia de xogos e apostas da Comunidade Autónoma de Galicia atribúense á Secretaría Xeral Técnica e do Tesouro en virtude do disposto no artigo 4 do Decreto 141/2024, do 20 de maio, polo que se establece a estrutura orgánica da Consellería de Facenda e Administración Pública.

No exercicio desta atribución competencial, correspóndelle á Secretaría Xeral Técnica e do Tesouro en materia de xogo o desenvolvemento das funcións de xestión administrativa, as cales exercerá a través da Subdirección Xeral de Xogo.



SEGUNDO - A Asociación Gallega de Jugadores Anónimos (AGAJA) ofrece atención especializada a persoas que padecen ludopatía e problemas derivados da adicción ao xogo, así como a realizar funcións de información, orientación e sensibilización ao conxunto da sociedade.

A asociación AGAJA figura inscrita no Rexistro Central de Asociacións da Comunidade Autónoma de Galicia co número 2004/7429-1ª.

O seu programa de actividades abarca:

- a) Dinamización dun espazo de encontro
- b) Organización de actividades socio-culturais, deportivas, lúdicas ou de calquera outro tipo
- c) Organización de cursos, seminarios, conferencias e outros actos análogos
- d) Elaboración e edición de materiais formativos, revistas, folletos e calquera outro tipo de publicación para a difusión das ideas da asociación

TERCEIRO - Entre os fins de AGAJA están os de:

1. Auxiliar e colaborar con persoas ou colectivos de persoas que teñan ou poidan ter trastornos de conduta, control ou doutra natureza derivados dos xogos de azar ou doutro tipo de actividade que constitúa ou poida constituir un trastorno psicolóxico de conduta.
2. Desenvolver os dereitos, auxilio, colaboración e solidariedade cos familiares ou persoas afíns ás persoas e colectivos reflectidos no punto anterior afectadas pola súa conduta.
3. Levar a cabo as actividades terapéuticas ou lúdicas precisas para a recuperación das persoas con trastornos derivados dos xogos de azar ou semellantes, e dos seus familiares
4. Promover e apoiar a súa reinserción social, e a dos seus familiares ou persoas afíns.
5. Sensibilizar á sociedade en xeral e, especialmente no ámbito familiar, escolar e laboral, sobre os riscos que os xogos de azar ou semellantes supoñen ó xogador habitual e ós seus familiares.

CUARTO – De acordo co establecido no artigo 26.2 da Lei 9/2007, do 13 de xuño, de subvencións de Galicia, cómpre salientar que neste convenio non son de aplicación os principios de publicidade e concorrência pública en atención a que esta actividade de interese público unicamente é desenvolvida en Galicia de xeito específico por dúas asociacións e que ambas as dúas asociacións son beneficiarias do mesmo importe de subvención por parte da Consellería de Facenda e Administración Pública.



QUINTO – De acordo co disposto no artigo 19.4 c) LSG establece que, con carácter excepcional, poderán concederse de forma directa subvencións para aquelas actuacións que acrediten razóns de interese social e humanitario. Neste suposto a beneficiaria desenvolve actuacións de interese social ao que debe engadirse que so existe outra asociación que desenvolve actuacións semellantes, a cal recibe da consellería unha subvención nos mesmos termos.

A entidade cumpre cos requisitos para obter a condición de beneficiario da subvención de acordo co disposto no artigo 10 da Lei 9/2007, do 13 de xuño, de subvencións de Galicia.

Polo exposto, ambas as dúas partes deciden establecer un convenio de colaboración en base ás seguintes:

CLÁUSULAS

Primeiro.- Obxecto

O obxecto deste convenio é a concesión dunha subvención directa por parte da Consellería de Facenda e Administración Pública en favor da Asociación Gallega de Jugadores Anónimos (AGAJA), para o financiamento de parte dos gastos de mantemento do local social situado na rúa Travesía de Vigo, 172 andar 2º, Vigo (Pontevedra) e de funcionamento da asociación (comunidade de propietarios, enerxía eléctrica, asesoría, telecomunicacións, e seguridade). Esta asociación desenvolve accións de prevención, promoción, divulgación, información, asesoramento en materia de xogo responsable.

Segundo – Obrigas da asociación AGAJA

A Asociación AGAJA queda obrigada a:

1. Destinar os fondos percibidos ao financiamento das actuacións referidas na cláusula terceira.
2. Consentir expresamente a inclusión dos datos relevantes deste convenio nos rexistros públicos que proceda, conforme coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da Comunidade Autónoma para o exercicio 2006 e artigo 16 da Lei 9/2007, do 13 de xuño, de subvencións de Galicia,
3. Dar axeitada publicidade do carácter público do financiamento concedido en virtude deste convenio, cumprir todas as condicións e obrigas recollidas nel, e someterse ás actuacións de supervisión e control previstas no mesmo, así como ás demais obrigas exixidas no artigo 11 da Lei 9/2007, do 13 de xuño.



4. Prestar a colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas.

Terceira. Obrigas da Consellería de Facenda e Administración Pública.

A Consellería de Facenda e Administración Pública aboará o importe da subvención, en cantidade de 7.000 euros (sete mil euros), con cargo na aplicación orzamentaria 10.01.611A.481.10 (CP: 2018 00106) dos orzamentos xerais da Comunidade Autónoma de Galicia para o ano 2025, na que existe crédito axeitado e suficiente para dar cobertura económica aos compromisos contraídos en virtude do presente convenio.

O gasto subvencionable son os gastos de mantemento do local social e de funcionamento da asociación, en particular, os relativos á subministración de luz, auga e telecomunicacións, as cotas á comunidade de propietarios e de seguridade do local social, así como os gastos de asesoría da asociación.

Cuarta. Xustificación e libramento dos fondos.

A achega económica da Consellería de Facenda e Administración Pública, realizarase nos termos requiridos no artigo 48 do Decreto 11/2009, do 8 de xaneiro, polo que se aproba o Regulamento da Lei de subvencións de Galicia (RLSG).

Permítese a realización dun pagamento a conta do 50 por cen dos gastos imputables ao convenio, que contemple os gastos realizados no primeiro semestre da anualidade 2025, e un pagamento final, de acordo co disposto no artigo 62 do RLSG. A asociación queda exonerada da constitución da garantía respecto dos pagamentos a conta, ao abeiro do disposto no artigo 65.1 letra f) do RLSG.

Para poder percibir o importe de subvención, respecto do pagamento a conta ou do pagamento total da subvención, a asociación AGAJA entregará a seguinte documentación:

- A conta xustificativa dos gastos totais de relativos á subministración de luz, auga e telefonía e as cotas á comunidade de propietarios do local social, así como os gastos de asesoría da asociación e de seguridade, acreditado mediante facturas e os correspondentes xustificantes bancarios de pagamento.
- O representante da asociación acreditará a realización do gasto subvencionable mediante certificación.
- Con anterioridade á xustificación da execución da actividade presentárase unha declaración do conxunto das axudas solicitadas, tanto das aprobadas ou concedidas, como das pendentes de resolución, para un mesmo proxecto das distintas Administracións Públicas competentes ou das súas entidades vinculadas ou dependentes.



En todo caso, a cantidade máxima que se obriga a achegar a consellería, reducirase na mesma proporción que represente a cantidade xustificada respecto do orzamento total presentado.

Toda a documentación xustificativa descrita nesta cláusula deberá presentarse á Secretaría Xeral Técnica e do Tesouro da Consellería de Facenda e Administración Pública antes do día 15 de decembro de 2025, con independencia da que, no seu caso, se presentara para acreditar o pagamento a conta.

A alteración das condicións tidas en conta para a concesión da subvención e, en todo caso, a obtención concorrente de axudas outorgadas por outras administracións, entes públicos ou privados, poderá dar lugar á modificación da resolución de concesión.

Quinto. Publicidade.

Este convenio será obxecto de publicación de acordo co previsto na Lei 1/2016, do 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de presupostos xerais da comunidade autónoma para o ano 2006, e artigo 16 da Lei 9/2007, do 13 de xuño, de subvencións de Galicia.

As partes asinantes do convenio manifestan o seu consentimento para que os datos persoais que constan neste convenio, así coma o resto das especificacións contidas no mesmo, poidan ser publicados no Portal da Transparencia e Goberno Aberto.

Así mesmo e, en cumprimento do disposto no artigo 20 da Lei 38/2003, do 17 de novembro, xeral de subvencións, o texto da convocatoria e a información requirida no ordinal oitavo do devandito artigo será comunicado á Base de Datos Nacional de Subvencións (BDNS).

Sexta. Causas de resolución.

O presente convenio resolverase por incumprimento total ou parcial por parte do beneficiario das súas obrigas recollidas neste convenio, sen prexuízo do establecido na Lei 9/2007, de 13 de xuño, de subvencións de Galicia, das supostos e obrigas de reintegro.

Sétimo. Compatibilidade.

De acordo co disposto no artigo 40.1 letra d) do Decreto 11/2009, do 8 de xaneiro, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera



Administración ou ente público ou privado nacional, da Unión Europea ou organismos internacionais.

Oitavo. Xurisdición.

O presente convenio ten carácter administrativo, quedando ámbalas dúas partes suxeitas á xurisdición contencioso- administrativa para a resolución de calquera conflito que puidese xurdir como consecuencia do mesmo e ó disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda, do 8 de abril de 1991.

Aínda que é un dos excluídos do ámbito de aplicación da lei 9/2017, do 8 de novembro, de contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, segundo especifica o seu artigo 4, ao non previsto aplicaráselle os principios recollidos no citado texto, co fin de resolver dúbidas e omisións que puidesen presentarse. Así mesmo, de maneira supletoria terase en conta o Decreto legislativo 1/1999, do 7 de outubro, pola que se aproba o texto refundido da Lei de réxime financeiro e orzamentario de Galicia e demais normativa vixente na materia.

Noveno. Seguimento do convenio.

Para facilitar o seguimento e cumprimento do Convenio constituirase unha comisión mixta paritaria, integrada polo Secretario Xeral Técnico e do Tesouro da Consellería de Facenda e Administración Pública e o Presidente da Asociación, ou persoas que designen no seu nome, e un representante máis de cada unha das partes.

As dúbidas que se presenten na súa interpretación, no caso de discrepancias, serán resoltas, visto o informe da Comisión de Seguimento, polo conselleiro de Facenda e Administración Pública, poñendo fin á vía administrativa.

A Comisión mixta ditará as súas propias normas de funcionamento, debéndose reunir cando o solicite algunha das partes:

As súas funcións serán:

- a) Interpretación do convenio
- b) Proposta, se é o caso, de addendas
- c) Intervención previa á resolución por incumprimento
- d) Coordinación das funcións das partes que interveñan.
- e) Calquera outra relacionada co desenvolvemento deste convenio



Décimo. Vixencia.

A vixencia do presente convenio será dende o momento da súa sinatura ata o 30 de decembro de 2025, sen prexuízo de que se podan atender gastos realizados dende o 1 de xaneiro de 2025.

Undécimo. Reintegro por incumprimento.

Se a entidade beneficiaria incorrese en falsidade ou ocultación de datos ou non acreditase, total ou parcialmente, o bo fin das cantidades percibidas, deberá proceder ao reintegro da totalidade delas en caso de incumprimento pleno, ou da parte proporcional en caso dunha falta parcial de xustificación, sen prexuízo da existencia das responsabilidades administrativas e penais que procedan.

Así mesmo, a entidade beneficiaria deberá reintegrar a subvención nos demais supostos previstos na normativa de aplicación.

Duodécimo. Normativa aplicable.

O presente convenio rexerese polo disposto na Lei 9/2007, do 13 de xuño, de subvencións de Galicia e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño de subvencións de Galicia.

En proba de conformidade co que antecede, ambas as partes asinan o presente convenio de colaboración, no lugar indicado e na data da súa sinatura dixital.

En representación da Consellería de Facenda e Administración Pública

O conselleiro

Miguel Corgos López-Prado

En representación de AGAJA

O presidente,

D. José Luis Comesaña Lorenzo

